

## Abadiyāh

### *Rab Adom kī Adālat Karegā*

<sup>1</sup> Zail meñ wuh royā qalamband hai jo Abadiyāh ne dekhī. Us meñ wuh kuchh bayān kiyā gayā hai jo Rab Qādir-e-mutlaq ne Adom ke bāre meñ farmāyā.

Ham ne Rab kī taraf se paighām sunā hai, ek qāsid ko aqwām ke pās bhejā gayā hai jo unheñ hukm de, “Uṭho! Āo, ham Adom se larne ke lie taiyār ho jāeñ.”

<sup>2</sup> Rab Adom se farmātā hai, “Main tujhe qaumoñ meñ chhoṭā banā dūngā, aur tujhe bahut haqīr jānā jāegā. <sup>3</sup> Tere dil ke ghurūr ne tujhe fareb diyā hai. Chūnki tū chaṭanoñ kī darāroñ meñ aur bulandiyon par rahtā hai is lie tū dil meñ sochtā hai, ‘Kaun mujhe yahāñ se utār degā?’” <sup>4</sup> Lekin Rab farmātā hai, “Khāh tū apnā ghoñslā uqāb kī tarah bulandī par kyon na banāe balki use sitāroñ ke darmiyān lagā le, to bhī main tujhe wahāñ se utār kar khāk meñ milā dūngā.

<sup>5</sup> Agar ḍākū rāt ke waqt tujhe lūṭ lete to wuh sirf utnā hī chhīn lete jitnā uṭhā kar le jā sakte haiñ. Agar tū angūr kā bāgh hotā aur mazdūr fasal chunane ke lie āte to thoṛā-bahut un ke pīchhe rah jātā. Lekin terā anjām is se kahīñ zyādā burā hogā. <sup>6</sup> Dushman Esau \* ke kone kone kā khoj lagā lagā kar us ke tamām poshīdā

---

\* **1:6** Esau se murād Adom hai.

ḵhazāne lūṭ legā. <sup>7</sup> Tere tamām ittahādī tujhe mulk kī sarhad tak bhagā deṅge, tere dost tujhe fareb de kar tujh par ḡhālib āeṅge. Balki terī roṭī khāne wāle hī tere lie phandā lagāeṅge, aur tujhe patā nahīn chalegā.” <sup>8</sup> Rab farmātā hai, “Us din main Adom ke dānishmandon ko tabāh kar dūngā. Tab Esau ke pahārī ilāqe meṅ samajh aur aql kā nām-o-nishān nahīn rahegā. <sup>9</sup> Ai Temān, tere sūrme bhī saḡht dahshat khāeṅge, kyōnki us waqt Esau ke pahārī ilāqe meṅ qatl-o-ḡhārat ām hogī, koī nahīn bachegā.

<sup>10</sup> Tū ne apne bhāī Yāqūb † par zulm-o-tashaddud kiyā, is lie terī ḵhūb ruswāī ho jāegī, tujhe yoṅ miṭāyā jāegā ki āindā terā nām-o-nishān tak nahīn rahegā. <sup>11</sup> Jab ajnabī faujī Yarūshalam ke darwāzon meṅ ghūs āe to tū fāsile par khaṛā ho kar un jaisā thā. Jab unhoṅ ne tamām māl-o-daulat chhīn liyā, jab unhoṅ ne qurā ḡāl kar āpas meṅ Yarūshalam ko bānṭ liyā to tū ne un kā hī rawaiyā apnā liyā. <sup>12</sup> Tujhe tere bhāī kī badqismatī par ḵhushī nahīn manānī chāhie thī. Munāsib nahīn thā ki tū Yahūdāh ke bāshindon kī tabāhī par shādiyānā bajātā. Un kī musibat dekh kar tujhe sheḡhī nahīn mārṅī chāhie thī. <sup>13</sup> Yih ṭhīk nahīn thā ki tū us din tabāhshudā shahr meṅ ghūs āyā tāki Yarūshalam kī musibat se lutf uṭhāe aur un kā bachā-khuchā māl lūṭ le. <sup>14</sup> Kitnī burī bāt thī ki tū shahr se nikalne wāle rāston par tāk meṅ baiṭh gayā tāki wahān se bhāgne wālon ko tabāh kare aur bache huon ko dushman ke hawāle kare. <sup>15</sup> Kyōnki Rab kā din tamām aqwām ke

---

† **1:10** Yāqūb se murād Isrāīl hai.

lie qarīb ā gayā hai. Jo sulūk tū ne dūsron ke sāth kiyā wuhī sulūk tere sāth kiyā jāegā. Terā ḡhalat kām tere apne hī sar par āegā.

### *Allāh kī Qaum Najāt Pāegī*

<sup>16</sup> Pahle tumheñ mere muqaddas pahār par mere ḡhazab kā pyālā pīnā paṛā, lekin ab tamām dīgar aqwām use pītī raheṅgī. Balki wuh use pī pī kar ḡhālī kareṅgī, unheñ us ke āḡhirī qatre bhī chāṭne paṛeṅge. Phir un kā nām-o-nishān nahīñ rahegā, aisā lagegā ki wuh kabhī thīñ nahīñ.

<sup>17</sup> Lekin Koh-e-Siyyūn par najāt hogī, Yarūshalam muqaddas hogā.

Tab Yāqūb kā gharānā † dubārā apnī maurūsi zamīn par qabzā karegā, <sup>18</sup> aur Isrāīlī qaum § bharaktī āḡ ban kar Adom ko bhūse kī tarah bhasm karegī. Adom kā ek shaḡhs bhī nahīñ bachegā. Kyonki Rab ne yih farmāyā hai.

<sup>19</sup> Tab Najab yānī junūb ke bāshinde Adom ke pahārī ilāqe par qabzā kareṅge, aur maḡhrib ke nashebī pahārī ilāqe ke bāshinde Filistiyon kā ilāqā apnā leṅge. Wuh Ifrāīm aur Sāmariya ke ilāqon par bhī qabzā kareṅge. Jiliyād kā ilāqā Binyamīn ke qabīle kī milkiyat banegā. <sup>20</sup> Isrāīl ke jilāwatanon ko Kanāniyon kā mulk shimālī shahr Sārpāt tak hāsil hogā jabki Yarūshalam ke jo bāshinde jilāwatan ho kar sifārād meñ jā base wuh junūbī ilāqe Najab par qabzā kareṅge. <sup>21</sup> Najāt dene wāle Koh-e-Siyyūn par ā kar Adom

---

† **1:17** Yāqūb kā gharānā se murād Isrāīl hai. § **1:18** Lafzi tarjumā: Yāqūb aur Yūsuf ke gharāne.

ke pahārī ilāqe par hukūmat kareᅅge. Tab Rab  
hī Bādshāh hogā!”

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

---

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30